

Pesilat dapat anugerah berprestij daripada pemerintah Canada

► **NURHUSNA HASSAN**
nhassan@sph.com.sg

SEORANG guru silat setempat, Encik Mohamed Khamin Said, telah menerima anugerah berprestij daripada pemerintah Canada bagi mengiktiraf sumbangan dan pencapaiannya dalam seni itu.

Malah, Encik Mohamed Khamin, 69 tahun, merupakan satu-satunya penerima dari Asia (tidak termasuk Jepun) yang menerima anugerah tali pinggang hitam, Canadian Black Belt Hall of Fame atau ringkasnya CBBHoF, itu.

Seorang pelajarnya, warga Canada, Encik Cezar Borkowski, duta serta pengarah teknikal CBBHoF, merupakan orang yang telah mencalonkan namanya kepada lembaga pengarah kumpulan itu.

Encik Cezar, yang mementingkan aspek kebudayaan dalam seni mempertahankan diri silat, menghargai bakat Encik Mohamed Khamin setelah berguru dengannya selama lebih 15 tahun.

"Cezar juga merupakan guru silat di Canada. Beliau sudah mahir dalam seni olah raga dan kini ingin mendalami pula seni silat dalam aspek kebudayaan," ujar Encik Mohamed Khamin.

Majlis penyampaian anugerah itu telah diadakan di Toronto, Canada, pada 23 Disember lalu. Namun Encik Mohamed Khamin tidak menghadirinya.

Justeru, Encik Cezar datang ke Singapura dengan membawa pingat untuk menyampaikannya sendiri kepada Encik Mohamed Khamin.

Bagi meraikan kejayaan beliau serta memberi penghargaan kepadanya, mantan Anggota Parlimen, Haji Wan Hussin Zoohri, yang juga mantan pengetua Sekolah Menengah Sang Nila Utama, telah mengambil inisiatif menganjurkan majlis kecil buat Encik Mohamed Khamin, bekas pelajar sekolah itu, pada 26 Januari lalu.

Semasa ditemui, Encik Mohamed Khamin berkata:

"Ini semua kuasa Tuhan. Saya rasa rendah hati menerima penghargaan ini."

Minatnya pada seni silat berputik seawal usianya empat tahun setelah melihat sendiri pergerakan seni silat yang hebat oleh guru-guru silat terdahulu.

Beliau pernah mengajar di beberapa kelab masyarakat dan pernah juga menghadiri persidangan silat antarabangsa dan menjadi juri dalam banyak pertandingan silat antarabangsa.

Isterinya, Cik Khairiah Shariff, 68 tahun, sentiasa menyokong minat dan bakatnya, katanya.



DAPAT PENGHARGAAN: Encik Mohamed Khamin dengan pingatnya yang diterima daripada 'Canadian Black Belt Hall of Fame' kerana komitmennya yang berterusan dalam seni silat dan seni mempertahankan diri. - Foto foto TUKIMAN WARJI



HARGAI BAKAT GURU: Encik Cezar Borkowski (kanan) yang mencalonkan nama Encik Mohamed Khamin, telah ke Singapura Disember lalu untuk memberikan pingat kepada beliau. - Foto ihsan SYED ABU BAKAR HUSSAIN ALJUNIED



RAIKAN: Penghargaan yang diterima Encik Mohamed Khamin (dua dari kanan) diraikan mantan Anggota Parlimen, Haji Wan Hussin Zoohri (dua dari kiri). Bersama mereka ialah Presiden Persatuan Bertindak Ginjal Bagi Masyarakat Islam (MKAC), Encik Ameer Ali Abdeali (kiri), dan Encik Muhammad Mazlan (kanan).

Anak-anaknya, Encik Mohd Khirwan, 44 tahun; dan Encik Mohd Asri, 41 tahun, juga berbakat dalam silat dan pernah memenangi pingat gangsa dalam Kejuaraan Silat Persatuan Rakyat Piala Sidek Saniff pada 1995.

Dua lagi anaknya, Cik Nazriah, 38 tahun; dan Cik Nurhaqimah, 25 tahun, turut menceburkan diri dalam bidang silat sejak mereka kecil tetapi tidak lagi aktif.

Encik Mohamed Khamin, yang kini pengerusi Persatuan Sang Nila Utama, masih lagi aktif dalam seni silat, malah berguru dengan seorang guru dari Kuala Lumpur, Encik Sawi Abdul Rahman atau nama gelarnya Pak Awi, 86 tahun.

Beliau berharap dapat terus menghidupkan dan memartabatkan lagi kesenian silat yang semakin kurang mendapat

tempat di sini berbanding silat olah raga menerusi persatuan yang dianggotainya sekarang, Gagasan Pencak Silat Beradat, yang memberi penekanan kepada silat tradisional.

Haji Wan Hussin pula berkata; "Saya rasa gembira dan ucapkan tahniah kepada beliau yang merupakan satu-satunya pesilat di Singapura yang diiktiraf di peringkat antarabangsa, sekali gus mengharumkan nama persilatan Singapura."

CCBHoF merupakan anugerah tahunan yang diberikan kepada beberapa individu yang telah menyumbang bakti dalam sejarah seni mempertahankan diri Canada.

Ia juga bertujuan membina warisan bagi generasi pengamal seni mempertahankan diri pada masa akan datang.